

# Korban Hantu Air

Penulis Cik Alin



Assalamualaikum dan hai pembaca semua. Terima kasih kepada pembaca yang tidak takut membaca kisah seram. Dah lama jadi *silent reader* bermacam-macam kisah seram sudah dibaca – justeru, rasa terpanggil nak berkongsi juga pengalaman sendiri sejak kanak-kanak hiperaktif sampai sekarang ni.

Perkenalkan diri aku sebagai Alin – terang-teranglah aku ni perempuan, umur 23 tahun, belum kahwin, dan masih lagi belajar di salah satu IPTA di Utara.



Banyak kejadian pelik yang aku alami sejak kecil sampailah aku bergelar siswi di IPTA di Utara semenanjung Malaysia ni.

Pertama-tama, jangan mengharap cerita aku ni *best* ker, *suam kuku* ker, *panas mendidih* ker, *sejuk membeku* ker – aku cuma nak berkongsi apa yang pernah aku lalui termasuk pengalaman kawan-kawanku yang rapat denganku. Sebut pasal kawan rapat ni, *okay let's start with my childhood story.*

Masa zaman kanak-kanak dulu, aku berkawan dengan lima orang ni saja — aku perkenalkan enam kanak-kanak hiperaktif iaitu tiga lelaki dan tiga perempuan — aku (Alin), Isa, Yati, Epul, Soleh, dan Emy (al-Fatihah untuk arwah).

Ya! Cerita ini aku nak tulis pasal arwah Emy — memang kamceng sangat — main sama-sama jer selalu — pendek kata dari main pondok-pondok, main kahwin-kahwin, lastik burung, kedingting, semua kita orang redah. 😊 Hahaha... indahny kenangan zaman budak-budak hingusan. Kita orang ni pula lebih kurang jer umur, pendek kata sama sebaya — kalau beza pun setahun jer — jadi takde hal nak berkawan-kawan di zaman kanak-kanak hiperaktif ini.

Buat pengetahuan pembaca, kampung aku ni sebuah kawasan Felda terletak di Kelantan. Oleh itu, pabila namanya dah kampung konfem pembaca boleh imagine suasananya macam mana? Ladang kelapa sawit yang luas, sungai, air terjun, dan hutan tu kira geografi paling basic larr.

Dipendekan terus kepada cerita, kalau tak lupa kejadian ini berlaku pada tahun 2002 — dah lama sangat peristiwa ini — aku ketika tu darjah 2.

Suatu hari ni, masa kita orang tengah main *hide and seek* macam selalu, tetiba Emy ajak kita orang pergi mandi sungai esoknya. Sudah aku nyatakan, kampung aku ni ada sungai, tapi sungai yang Emy ajak pergi ini

sungai yang agak besar dan jarang budak-budak kampung pergi, sebab kedudukannya jauh terletak dalam ladang sawit — kena lalui kebun getah pula tu 😱 jauh kaw nak jalan kaki ni woi! Jadi kita orang yang perempuan ni tarik diri tak mahu ikut — alasan takut mak menyinga kat rumah. Tinggallah dia orang bertiga yang jantan-jantan jer nak pergi mandi sungai.

Petang *hide and seek* pun berlalu dengan masing-masing balik ke rumah. Esoknya mengikut perancangan yang sudah dipersetujui, dia orang bertiga pun pergilah ke sungai berkenaan.

Ya! sungai tu cantik sangat — biasalah sungai yang masih terpelihara kehijauan ekosistemnya — airnya sejuk seolah-olah bertingkat macam air terjun — memang tak puaslah kalau mandi di situ. Ikan pula banyak, kecap-kecap timbul, kecap-kecap timbul, besar-besar pula tu. Seperti yang dirancang, mereka bertiga sampai juga akhirnya ke destinasi yang dituju — sungai yang jarang budak-budak kampung pergi.

Apa lagi teruja sangatlah budak-budak ni tambah-tambah lagi Si Emy. Pembaca nak tahu — Emy ni punya teruja sampai tak sempat buka baju terus berjebur terjun ke dalam air sungai.

Epul dan Soleh pula sedang terkulat-kulat nak buka baju terus hairan — Emy ni terjun, tapi tak timbul-timbul — biasakan kalau budak-budak terjun ke dalam air beberapa saat jer terus timbul balik — tapi tidak

terjadi pada Emy. Soleh dan Epul pula dah — dup dap dup dap berdebar-debar tunggu Emy timbul balik. Dalam masa seminit jugalah berdebar-debar tup tup tup Emy timbul.



Memang betul-betul memeranjatkan apabila timbul sahaja Emy terus Epul dan Soleh bertanya...

**Epul** : Woi! Kenapa kau menyelam lama sangat?

**Soleh** : Sungai ni dalam ker?

Nak tahu tak apa jawapan Si Emy setelah terjun ke dalam sungai, tapi lambat timbul?

**Emy** : Woi! Aku jumpa sorang perempuan cantik dalam air sungai ni. Perempuan tu pakai baju cantik warna merah macam puteri — dia ajak makan.

Terkebil-kebil Epul dan Soleh mendengar kata-kata Emy — dalam sungai ni ada puteri cantik pakai baju warna merah!

**Emy** : Puteri tu ajak makan nasi dan minum air susu — sedap sangat makanan tu.

Soleh dan Epul menggaru-garu kepala memerhatikan sekeliling sungai — kot-kot ternampak puteri yang dikata-katakan oleh Emy.

**Emy** : Puteri tu suruh aku naik ke darat ajak kau berdua — makan.

Tergegaulah dia orang berdua ni mendengar kata-kata Emy — puteri tu ajak makan. Emy beria-ia ajak dia orang berdua ni turun sekali...

**Emy** : Jom larr terjun puteri tengah tunggu tu.

Puas Emy ajak, tetapi Soleh dan Epul — masing-masing enggan terjun ke dalam sungai.

Pembaca yang budiman, itulah hayat hidup terakhir Emy kerana terlalu seronok sangat dapat makan bersama puteri berbaju merah, sekali lagi dia terjun meninggalkan Soleh dan Epul. Mesti pembaca dapat jangkakan apa terjadi lepas tu? Ya! Jangkaan pembaca yang budiman memang tepat...

**Alin** : Emy terjun 🤔 tak timbul-timbul lagi.

Puas Epul dan Soleh memanggil-manggil Emy — masa terus berlalu, tapi Emy tetap tak timbul-timbul. Pembaca bayangkanlah masa tu dia orang berdua dalam umur 8 9 tahun — apa jer kanak-kanak baya ini mampu buat untuk tolong Emy? Maksudnya, Epul dan Soleh tuh tak berani nak turun menyelam mencari Emy — apa yang

mampu dia orang berdua buat hanyalah terjerit-jerit panggil nama Emy kat atas tebing sungai jer.

Dalam keadaan menangis. Soleh dan Epul terus balik dan menuju ke rumah Emy – dia orang berdua teresak-esak menangis di hadapan kedua ibu bapa Emy – memaklumkan berita kehilangan Emy di sungai. Serta-merta meraunglah mak Emy memikir yang bukan-bukan dah berlaku kepada anaknya.

Petang tu juga, seluruh kampung terutamanya anak-anak jantan remaja dan pakcik-pakcik old timer dikerah mencari Emy di sungai. Namun apakan daya, jasad tidak ditemui – malam itu laporan polis telah dibuat dan pasukan penyelamat telah dimaklumkan untuk meneruskan operasi mencari Emy – keesokannya.

Esoknya, satu kumpulan besar-besaran kembali ke sungai. Ada kumpulan diarahkan mencari di atas darat sekitar sungai. Ada juga kumpulan yang pandai berenang serta pandai menyelam – terjun mencari jasad Emy di dasar sungai. Buat pengetahuan pembaca, sememangnya sungai ini agak dalam bagi kanak-kanak seperti mereka bertiga ini.

Mesti pembaca tertanya-tanya, apa yang lima kawan rapat Emy ni buat – kan?

🙄 Hmm... dah sah-sahlah pabila kejadian tragik ini berlaku, lima kawan rapat Emy ni kena marah kaw-kaw dengan ibu bapa masing-masing.

Lima kawan kamceng Emy ni dilarang keras sekali gus dikuarantinkan daripada ikut kumpulan operasi mencari Emy di sungai. Apa yang buat aku, Isa, dan Yati, ni bertambah terkejut — rupa-rupanya tiga orang kawan kamcengku ini pergi mandi sungai — langsung tak minta kebenaran ibu bapa nak ke sungai tu — Allahhu.

Berkat doa dan usaha kumpulan pencari, akhirnya jasad Emy yang dah tak bernyawa dijumpa di dasar sungai — itupun sebab tersangkut pada kaki salah seorang penduduk kampung yang ikhlas menyertai operasi menyelam mencari jasad Emy.

Pabila dibawa ke atas darat, jasadnya sudah kaku, pucat, dan kesejukan. Perut arwah juga kelihatan sedikit buncit mungkin kerana banyak tertelan air. Mayat dibawa ke hospital untuk dibedah siasat.



Apa yang memeranjatkan — hasil bedah siasat mendapati, selain dipenuhi air — dalam perut arwah terdapat cacing tanah dan dipenuhi telur semut yang memutih — Allahurabbi. Mungkin inilah yang dimaksudkan oleh arwah — makanan berupa nasi dan susu dari puteri baju merah.

Setelah kematian arwah Emy, geng budak-budak hiperaktif ini dah tak berani nak buat benda-benda nakal, tanpa pengetahuan ibu bapa.

Alin : 😬 Eh... jap! Mesti pembaca tertanya-tanya – macam mana aku boleh tahu Emy jumpa puteri tu sedangkan aku tak ikut mereka bertiga mandi sungai?

😞 Hmm... lepas berkabung dekat seminggu, kita orang tak keluar bermain sama-sama – sesudah seminggu barulah kita orang berkumpul lagi. Ketika berkumpul ini larr Epul dan Soleh cerita kepada budak-budak perempuan misteri puteri baju merah sebelum kematian Emy. Serius, sedih sangat hilang kawan dalam keadaan macam ni.


Mengikut cerita orang kampung, mungkin puteri yang dijumpai oleh arwah Emy adalah jelmaan Hantu Air ataupun penunggu di sungai, sebab adakalanya kaki pancing ke sungai tu – sesekali mereka akan ternampak seekor ikan yang agak besar – sebesar manusia timbul memunculkan diri dipermukaan air – sisik ikan berkenaan keseluruhannya berwarna hitam pekat dan berkilau-kilau.

Selepas kejadian yang menimpa arwah Emy, beberapa kes mati lemas masih berlaku di sungai itu, tapi memakan masa selang tahun yang agak lama – kata orang kampung, penunggu sungai itu menagih korban – korban apa?



**Alin** : Itu aku tak pasti – wallahualam.

Masa terus berlalu, sekarang dah 2017 pun masih ramai yang tidak berani mandi-manda di sungai tu. Kalau ada yang pergi pun dalam kumpulan yang ramai, dan tidak akan ada yang berani bermain di tempat arwah-arwah menjadi korban.



Sekian saja, perkongsian pengalaman aku untuk kali ini. Episod seram seterusnya akan aku kongsi banyak lagi kisah-kisah yang terjadi pada diriku pula. Terima kasih kepada pembaca kerana sudi baca. Maafilah kalau tulisan aku berterabur dan bahasa agak lintang-pukang. Apa-apa komen untuk penambahbaikan amat dialukan. Terima kasih semua. 🐼